

李文襄公別錄

李文襄公別錄卷之六

文告紀事

示諭從逆官民亟早歸命

大兵連奪仙霞三關告示

撫輯開化縣難民告示

曉諭西江常難民認領子女完聚

再諭陷賊百姓速歸樂業

曉諭難民立候親臨賑濟

曉諭耿逆乞撫情形

曉諭懷疑閩人歸命

飭修鄰境道路統師親勦

曉諭西安江山常山開化四縣寬徵

示禁擾害來歸被脅人民

嚴飭速繳偽劄告示

宣布慰問出征綠旗官兵告示

再諭陷賊官民迅速就撫

示撫江西廣信等處被陷官民

曉諭陷賊未歸人民

申飭吏治告示

釋廣信俘囚招撫地方告示

嚴禁潛攜難婦他往告示

示禁縱馬踐食禾苗

示禁踐踏粟地強採橘果

示禁橫索夫役

行十一府屬嚴飭叛逆告示

嚴拏真蠹飭禁株累告示

力敦風俗儉樸告示

禁革漕弊十款告示

嚴禁奸民通海告示

申飭合屬文武告示

嚴禁賭博告示

嚴禁營債告示

禁革巧取火耗告示

嚴禁關稅橫徵告示

嚴禁捕役誣良告示

嚴禁衿棍條陳告示

嚴禁兵捕假緝私鹽告示

李文襄公別錄卷六

男 鍾麟編次

示諭從逆官民及早歸命

康熙十五年七月

爲閩省構亂難支耿逆死亡已迫亟宜自拔歸命早  
沐

皇仁事照得耿精忠驕縱狂戾乘吳三桂稱戈犯順墮其  
狡謀忽發難端犯我浙界兩載以來百姓被其慘毒  
實難盡言其陷溺湯火者惟福建百姓爲尤甚三丁  
抽一五丁抽二使父兄老幼咸戍沙場婦人輸布女  
子輸糗致孤寡伶仃悉供征繕誅求餉戶拷掠盡其

脂膏擅造偽錢荼毒遍於市井種種惡蹟罄竹難書  
且其藉爲聲援者則遠交吳逆而近結鄭錦今當

上天厭亂首殛元兇吳三桂已於五月二十八日病死鄭  
錦乘機吞并占踞漳泉興汀等府直搗福寧耿逆膽  
落無路投生是福州已如朝露爾等捨父母妻子強  
被抽充而來者悉皆無家可歸之人嗟嗟耿逆不能  
自保首領而能顧惜爾等身命乎卽統領爾等之頭  
目已據進退維谷之勢其心搖搖莫定尙能固一爾  
等之衆志乎當此之時捨投誠之外別無他策第聞  
賊營捏造訛言謂各處土賊投降者皆生惟福建人

投降必殺以故爾等持疑卽有逃出老營者皆各寬  
匿山谷希圖緩死被賊捉獲立時誅戮殊不知爾等  
不幸生於閩地遭此惡劫爲耿逆驅迫非出本心  
朝廷伐罪弔民救焚拯溺本部院宣布

皇仁總以好生爲德豈有畛域之殊自凡渡河來歸者不  
論何處人民一出逆境有生無死故特倡率捐資搭  
蓋篷廠使得居住分給賑米以資贍養有官職者仍  
復其官若能擒縛渠首率領兵馬而來必爲特疏

題請加以高爵顯秩用示優異爾等更何遲疑觀望不  
趁此機會汲汲歸命必欲束手待斃相率同死哉最

可異者衢屬附近從賊之人投入賊營不過爲彼服役視同奴隸緩則供其爨汲之事急則驅於鋒鏑之間本部院屢示曉諭豈竟全無覺悟究其甘心蟻聚以待死者大約因平日附賊既經擾害地方惟恐投順之後仇家必圖鳴官報復以故畏懼觀望自今已後果能革心向化已往之事一槩不許追究俱准給照歸農合再開誠招諭爲此示仰賊營被脅諸色人等知悉務須亟乘此時大兵尙未進剿星速來歸不論閩人浙人但離賊營卽屬赤子決不使爾失所本部院全以恩信昭示遐邇諒亦周知更可轉相傳說

使其各自爲計總之不計零星大隊過河之後自必  
安插得宜行賞敘功毫髮不爽卽有從前過惡槩行  
寬宥不許仇家報復永絕釁端如猶不悟是本部院  
必欲全爾之生而爾自甘受死兵威所至寸草不留  
彼時本部院卽欲保全爾等亦不可得矣思之思之

大兵連奪仙霞三關告示

康熙十五年八月

爲衢寇業經掃滅大兵已奪仙霞剋日蕩平事照得  
閩逆負嵎已逾兩載今大兵雲集下洲僞驍騎馬九  
玉等大敗潰逃江山常山開化縣城俱已恢復於八  
月二十一日連奪仙霞三關

王師乘勝入閩耿逆授首可期合行曉諭爲此示仰督  
屬官吏軍民人等知悉兵入三關賊險已失長驅掃  
靖指日蕩平自此兩浙安寧永享平成之福故特曉  
諭俾令通知

撫輯開化縣難民告示

康熙十五年八月

爲開誠撫輯生全民命事照得閩賊肆虐凡淪陷地方人民盡遭湯火今者

王師奮勦逆賊敗逃正爾百姓更生樂業之際合亟出示撫輯爲此示仰開化縣被難人民知悉立刻剃髮歸誠凡係脅從卽有從前罪愆槩不追究勿生疑畏致負軫恤特示

曉諭西江常難民認領子女完聚

康熙十五年八月

爲曉諭認領搶失子女急圖完聚事照得逆賊慘毒  
將被陷地方良民子女向來擄掠者悉皆寄頓江山  
以爲三窟今大兵恢復之後通查難民子女甚多已  
經本部院諭令該縣另擇空房加謹安置一面行着  
親屬認領在案但內有隔縣人民路途遙遠未及周  
知合行曉諭爲此示仰難民人等知悉如有子女從  
前被賊擄帶藏匿江山者立即前赴該縣報明對同  
年歲籍貫速領回家完聚倘有官兵措勒許卽指名  
具呈以憑叅處或地棍冒名捏認查出一體重究

再諭陷賊百姓速歸樂業

康熙十五年八月

爲乘時亟宜歸撫早沐

皇仁事照得爾民先因逆賊迫陷原屬勢不得已今地方業已平復爾等各有廬舍田園父母妻子正當及早復爲良善何苦竄身山谷自致失所本部院屢奉

皇恩申諭凡爾等一切從前罪愆槩不追究務必保全安輯合再曉諭爲此示仰陷賊被脅一應人等知悉各仰體本部院至意迅速歸誠復完家室重整田園卽有無依准與賊恤安插萬勿自誤若再冥頑梗化發兵搜捕立成齏粉悔之晚矣

曉諭難民立候親臨賑濟

康熙十五年八月

爲曉諭難民立候親賑以甦窮困事照得衛民不幸  
慘遭荼毒三年已來本部院時切痼瘼今賊雖敗遁  
爾遺黎室廬化爲瓦礫田土盡沒蒿萊極目荒涼欲  
歸無計是欲安輯爾民必須亟施賑濟前已檄行該  
府查議去後若待轉報花名造冊詳請恐費時日頃  
見遠鄉近地鳩形鵠面男婦扶老攜幼求賑紛紛正  
如久病之人元氣未復亟資湯藥稍或遷延安望起  
色本部院既喜爾民之已出水火又痛爾民之未免  
飢寒拯濟之施不容刻緩令卽曉諭爲此示仰被難

士民人等知悉聽候酌定日期分設賑廠凡係同村  
之人各聚一處俟一面派委職官動支銀兩本部院  
親臨賑所點齊散給務使各沾實惠少蘇困苦再圖  
生計以見本部院軫恤至意特示

曉諭耿逆乞撫情形

康熙十五年九月

爲曉諭閩省乞撫情形事照得浙閩毗聯致遭禍亂  
地方困苦之狀不堪備述今大兵分路進剿沿途望  
風投順直抵延平頃據建寧府塘報耿精忠已遣差  
員陳善道等來營乞撫併齎有陳

奏自訴從前不得已之由欲懇

大將軍親王閱過代

題業經

親王俯加慰諭限期親赴歸順准爲保全隨差蝦員折  
爾兔千總鄭化蛟等同來員往省并諭延平僞左將

軍耿繼善僞右都尉呂雲翔等俱各到營投見等語  
是就撫已定立見昇平浙省自可安堵合卽通行曉  
諭爲此示仰官民諸色人等知悉念爾民被寇地方  
久罹兵燹稍遠府縣亦苦徵收今幸首禍革心鄰封  
底定行當力圖休養務各安生樂業以副本部院軫  
懷至意

曉諭懷疑閩人歸命

康熙十五年九月

爲曉諭閩人乘時歸撫以全身命事照得賊渠敗遁各處接踵投誠經本部院安插得所聞惟閩人心懷疑懼未卽輸誠殊不知浙人閩人總是

朝廷赤子本部院原無岐視合亟開誠曉諭爲此示仰各處被脅福建人等知悉爾等亟宜乘時歸命有能率衆輸誠悉照原銜授職其餘願効用者酌給大糧入伍願歸農者發回原籍安插務令各得其所同樂昇平慎勿游移疑畏自失良機致貽後悔特示

飭修鄰境道路統師親勦

康熙十五年九月

爲飭修道路以利官兵進勦事照得耿逆竊踞閩疆浙省江右盡遭流毒今大兵直取延平浙境寧謐豈容鄰封尙阻聲教本部院身任封疆滅賊安民

國事攸關奚分畛域茲親統軍旅由常山玉山往廣信一帶掃蕩餘氛誠恐道路傾圯馬匹難馳合行飭修爲此牌仰經過常山玉山廣信等處地方官民人等知悉卽便預爲料理開路疊橋伺俟本部院大兵經臨如有延誤治以軍法勦逆撫順總爲地方民生起見一勞永逸各宜踴躍趨事均勿遲違

曉諭西安江山常山開化四縣寬徵

康熙十五年九月

爲曉諭初集殘黎槩免徵科安心復業事照得衢屬淪陷地方數年以來困苦已極田地拋荒老弱轉死甚有不忍見聞者幸今拔離湯火重見天日而瘡痍未起流亡未歸此正多方補救之時本部院見在一面設法賑濟務必培養休息以慶更生使人民照常復業斷無催徵錢糧之事昨據西安士民張義升等呈籲俟該縣詳覆再行藩司確議本部院爲民請命當卽特疏具

題槩行蠲免以恤民困合行曉諭爲此示仰新復各縣

士民人等知悉各宜安心復業作速開墾耕作秋成  
漸畢正宜佈種春花以資贍養俟民力蘇息漸復元  
氣方議開徵本部院軫恤民艱無微不至誠恐士民  
過慮遠赴具呈故特通知俾各安心耕種以副拳拳  
至意

示禁擾害來歸被脅人民

康熙十五年九月

爲嚴禁擾害來歸以鼓向化事照得閩逆敗遁之後凡被脅人民曾在賊營者不論是官是兵但經剃髮歸里卽係平民從前罪愆槩不追究已奉有

親王令諭頒示在案雖未到官投明悉皆准復本業誠恐地方棍徒因其向經從賊未據到官藉端索詐有失撫輯至意合行嚴禁爲此示仰被脅諸人及地方人等知悉但經剃髮不論曾否到官悉與平民無異安分樂生照常度日如有棍徒借端詐害許被害民人指名呈稟以憑嚴拏究治不貸

嚴飭速繳偽劄告示

康熙十五年九月

爲嚴飭速繳偽劄以杜後患事照得被陷人民失身  
從賊今既悔禍來歸本都院業已宣布

皇仁赦其已往自應洗心滌慮慶幸更生所有領授偽印  
劄付無異追魂奪命之符不祥孰甚亟宜繳銷以絕  
禍根誠恐爾等無知藏匿未繳萬一日後發覺百喙  
難辯合亟曉飭爲此示仰一應投誠人等知悉如有  
從前曾受偽印偽劄者通限三日內交明地方官轉  
繳查銷永杜後患倘有隱匿收藏卽非實心向化或  
被旁人首發定行嚴拏從重究處不貸

宣布慰問出征綠旗官兵告示

康熙十五年九月

爲欽奉

上諭事康熙十五年九月二十一日

欽差刑部郎中色 臨衛宣傳

皇上面諭自逆賊叛變以來浙江綠旗官兵衝鋒對壘奮  
勇用命勞苦已極殊爲可嘉到彼俱加慰問官兵好處  
嗣後更當勉勵欽此欽遵令卽曉諭爲此示仰各標營  
出征官兵知悉浙省師旅効力行間仰厯

九重軫念口宣

德音凡屬將士兵丁俱當感浹頂踵銜漢肺肝盡心竭力

以報

國恩嗣後益宜倍奮忠勇一體欽遵毋違

再諭陷賊官民迅速就撫

康熙十五年九月

爲乘時亟宜歸撫早被

皇仁事照得閩逆構禍侵犯疆圉無知愚民爲賊煽誘迫脅投身陷穽殊可哀矜本部院念切好生開誠招撫凡屬來歸槩免從前罪愆今大兵已入福州耿精忠俯首就撫閩省已經底定爾等尚不乘時歸命更待何日合再開誠曉諭爲此示仰陷賊被脅一應人等知悉務須幡然悔禍迅速來歸復爲良善或願報効或願歸農悉准分別安插必不令爾失所毋得遲疑驚畏有負本部院矜恤至意

示撫江西廣信等處被陷官民

康熙十五年十月

爲安輯鄰封招撫投誠共沐

皇仁事照得江右與浙西地方唇齒相依自閩變三年兩  
省人民悉遭荼毒今大兵克捷渠魁就撫浙境安寧  
惟廣信餘寇現今三省會剿立見蕩平但念爾民久  
被賊陷疆域雖分誰非赤子本部院誼難膜視特分  
兵進取廣示招徠務期安全復還良善合亟曉諭爲  
此示仰江西被陷一應官吏人等知悉念爾等久遭  
寇虐困苦已極浙兵所到總爲寧爾百姓不論是兵  
是民曾否受職但悔過剃髮並准來歸本部院信賞

直實軍紀森嚴無疑無擾爾等不得觀望自誤有負  
恒鄰至意

曉諭陷賊未歸人民

康熙十五年十二月

爲諄切曉諭陷賊愚民立速來歸以免誅戮事照得  
逆賊變叛肆毒侵疆姦淫搶擄無所不爲強暴傷殘  
有生罕見我

皇上軫念羣黎遭其淪陷爰是調遣大兵刻期掃靖凡在  
食毛踐土均當義切同仇上則奮勵忠勤共圖殲滅  
次則聯絡守禦保護身家無如頑冥無知聽其煽誘  
或供應盜糧或甘爲驅使或因片紙僞劄冒稱職官  
委身命於不顧或自投入賊寨充當寇兵致首領之  
不保更有竄踞溪山招奸聚衆潛伏僻路揆息傳音

天戈所至非膏鋒鏑卽作俘囚見今本月二十日官兵進  
剿擒獲張左金壽袁生穆一郎李有子李壽周春丘  
宗等審皆係正賊頭目無可矜疑已經正法其餘人  
等雖髮長過肩從賊已久論法誠無可寬緣奉有

恩旨憫念陷賊民人原皆赤子翦辮蓄髮此係愚民貪生  
怕死暫免須臾之恆情仍令多方安輯欽遵在案本部  
院會同

平南將軍仰體

德意不忍槩加誅戮准予自新竝經釋放因念陷身賊地  
之人實繁有徒合行諄切曉諭爲此示仰陷賊地方

人等知悉爾等皆係土著良民各宜安居恆業遭賊逞兇田地被其蹂躪衣資被其搶劫室廬焚燬骨肉流離甚至父子弟兄多遭殘殺母妻兒女盡被姦淫如此慘酷安有沉迷到底不思棄逆效順者哉爾等試觀

聖朝節次恢復地方一應錢糧皆已停徵各項軍需皆發價買且賑濟頻施撫恤備至投之身陷賊中重斂苛求橫虐凌賤妻孥不保性命難全者何啻天淵爾等急當猛省相約來歸本部院加意安插各令得所已往之罪槩不深求如再遲疑觀望大兵到日玉石俱

焚後悔無及思之思之

申飭吏治告示

康熙十五年十二月

爲申嚴吏治共濟民生以收治平之效事照得兩浙人民自軍興以來死於盜賊兵戈轉徙四方者不可勝計卽偏僻粗安之處亦皆困於徵輸徭役骨盡皮穿苦累已極而不肖有司非惟不加軫恤反乘此用兵擾攘之際借端掊克漁利擾民訥法營私無所不至如近日於潛知縣爲閩縣士民告發已經叅處此彰明較著者也府官表率全郡司道綜核庶務自應力持風紀振飭官方何以未聞有所釐剔本部院雖遠在軍中地方各官一舉一動無不洞如觀火其間

借事風生吸詐富戶者有之假公濟私勒詐僚屬者有之徇情鬻獄縱蠹害良者有之弊竇叢生貪風日熾嗟此才遺不死於盜賊兵火而復消磨於司牧腹削之手者又不知凡幾矣本部院痛心已久特以軍務倥傯未暇整頓今地方已平民瘼堪念若非改絃易轍何能物阜民康合行通飭爲此示仰督屬官吏人等知悉凡平日居官盡職潔己愛民者嗣後務宜益加黽勉譽起循良其居官曠職貪黷殃民者嗣後務宜洗滌肺腸改過遷善若猶殘民以逞恣所欲爲本部院訪聞的實白簡立加該司道庇縱瞻徇一體

叅處乘茲告誡之初及早同心共勦治理庶兵革戢  
黎早復元氣以收治平之效使百姓羣相愛戴爾各  
官永保令名不亦善乎慎毋以本部院諄摯良言視  
同泛常自貽伊戚

釋廣信俘囚招撫地方告示

康熙十五年十二月

爲特釋俘囚廣示招撫速行效順以沐

皇仁事照得閩省就撫以來遠近有名僞帥無不望風輸款浙境悉已廓清江西密邇鄰封如雁門關僞崇義將軍廣信府僞襄武將軍悉皆齎繳僞印反正來歸其他總兵副叅遊守呈繳劄記者更不可勝數

朝廷恩覆如天一體宥過錄用本部院駐劄衛城各路赴軍前投誠者俱經賞賚

題敘恩禮有加惟德興一帶賊首馬鵬等跳梁出沒擾害地方人民塗炭是以本部院題

請三省會勦今大兵一至馬鵬立刻生擒解赴轅門除卽  
梟首示衆外復據浙江提標遊擊郭守金等於本月初一日撲勦上饒將陣獲賊衆獻俘前來本應立正典刑以示懲儆第本部院仰體

皇仁好生爲德不殺爲武嗟此頑民陷身賊境隨聲附和誅不勝誅特行宥免據稱鉛山弋陽等處向有烏合之衆勢窮力詘久思向化無路來歸如果出於至誠凡從前被迫脅之人誰非版圖赤子惟因江右道路梗塞自拔無由此情殊可矜憫合卽給示招撫爲此示仰被陷一應人等知悉江浙雖屬鄰省本部院痛

念地方久罹寇虐餘氛一日不靖百姓一日不安心  
切同體無分彼疆今大兵雲集上饒何難四路撲剿  
盡絕根株然兵威火烈於心有所不忍爾等既有志  
歸誠不妨逕赴本部院軍前傾心革面自當一體具  
題從優錄敘或願歸農或願効用各聽其便總令安插  
得所使爾等父母桑梓之鄉早覩太平安居樂業同  
游光天化日之下按之東竄西奔致被官兵擒斬者  
何啻天淵各宜猛省燕矢事機如再執迷後悔何及  
思之思之

嚴禁潛攜難婦他往告示

康熙十六年二月

爲嚴禁潛攜難婦他往特飭稽查事照得浙東各屬因地方惟變官兵出師恢勦原爲靖亂安民屢准部文嗣後殺賊之餘難民子女許令民間認領不得妄行搶擄刊刻告示曉諭百姓等因奉有

俞旨欽遵在案但滿漢旗營其中奉法者固多乘機搶帶者正復不少以致骨肉離散傷心慘目不忍見聞今難民陶人麟金允升匍匐京師伸冤控告現准部文嚴行查給除檄行按察司逐一確查彙詳核奪外今不法兵丁惟恐搶帶子女有干禁例寄頓省城者故

爲藏匿更有裝載登舟潛攜北上希圖滅跡事關部  
案勢必水落石出根究尋查地方各官里甲人等漫  
無稽查殊干法紀合行嚴禁爲此示仰兵民人等知  
悉凡有從前搶帶難婦人口已經贖還者槩不追究  
現在省城各旗營未經查明者一槩不許搬移遣發  
如有潛攜他往裝載上船該地方官鄰佑里甲船埠  
卽時攔阻一面稟報該管官立刻查明具報各城門  
關津處所一體稽察倘致通同徇隱受賄放行查出  
從重究提地方官不行覺察一併

題叅此係報部案件毋得視同泛常自取罪戾

示禁縱馬踐食禾苗

康熙十七年六月

爲額天嚴飭縱放馬匹踐食菽粟以安民生事據西安縣繆村難民繆節秀等詞稱竊身地方播種菽粟爲生向遭寇亂荒蕪數載今荷昇平蒙撫歸家開墾種植不知何營官兵縱放馬匹踐食幾盡身等鄉懦愚民不敢趕逐哀叩嚴飭收回馬匹無許踐食菽粟等情到本部院據此爲照營兵縱放馬匹踐食禾苗先經本部院通檄嚴飭在案據呈前情合再給示禁約爲此示仰兵廝里民人等知悉嗣後馬匹止於空野郊原牧放敢有不法兵丁於民間開墾種植處所

縱肆放青以致踐食菽粟妨廢民業者許被害人等  
指名呈稟以憑嚴拏重究該管官縱兵擾民一併叅  
處不貸

示禁踐踏粟地強採橘果

康熙十七年九月

爲號天勅示嚴禁兵丁踐踏粟地強採橘果以裕

國課以安殘黎事據西安上萬里民萬元等呈稱身等  
世居上萬路值通衢遭寇殘害之後僅存橘木數株  
開墾荒蕪種植粟米供課資生近有兵丁成隊踐踏  
粟地強採橘果目擊心悲哀阻拂怒抽刀毆打荼毒  
何堪伏乞賞示禁約等情到本部院據此爲照西安  
上萬兵燹之餘小民倍嘗慘苦種植橘果粟米輸課  
資生公私倚賴值此收成之際豈容兵丁成羣用強  
採摘踐踏傷殘甚至行兇毆打大干法紀合行嚴禁

爲此示仰兵民里甲人等知悉嗣後敢有不法兵棍  
經過地方擅採橘果踐踏粟地肆行騷擾凌虐鄉愚  
者許會同鄰甲協拏鳴稟以憑重處決不輕貸另聞  
地方各官亦常差役收買橘果致妨民間貿易殊屬  
不合一併禁止各宜凜遵特示

示禁橫索夫役

康熙十七年九月

爲嚴禁勒索夫差以甦民累事照得處屬自兵燹之後哀鴻甫集百廢待興本部院念此遺黎力圖休息愛養麗水青田二縣爲甌郡孔道除白牌小票例有嚴禁不許支用人夫外凡關緊急軍務以及運送軍火錢糧等項勢必取用應付以勤機務查自處至甌係屬下水一帆可到原無撥給絳夫之事頃據溫處道呈詳乃有不法弁兵或指緊急軍機或借風逆潮汝咆哮肆橫額外勒夫甚至欺官辱吏婪私折乾種種不法大干軍紀合行嚴禁爲此示仰官吏弁兵人

等知悉嗣後敢有不法弁兵於牌票所開應付外橫  
索下水緯夫或既坐船隻復勒陸路應付折乾肥己  
藐官害民恣肆騷擾者該縣指名申報以憑嚴拏從  
重究治本官縱容失察一併叅處不貸

行十一府屬申飭叛逆告示

康熙十八年十一月

爲申嚴叛逆之條曉飭愚頑各保身命事照得四民  
樂業耕鑿絃歌孝弟力田仰事俯蓄使父母妻子安  
然歡聚此人生之大幸也浙屬數年以來游經兵燹  
愚民乘機鼓煽死於鋒鏑者不可勝計此猶以鄰變  
蔓延遘此惡劫痛定思痛正宜寒心股栗各相儆戒  
共樂昇平不意尚有邵良楞張用益等造刻印劄謀  
爲不軌發覺於浦江繼則楊有忠胡君彩等結夥倡  
亂於縉雲分割稱官幾同兒戲方一舉動旋即就擒  
今邵良楞等已經

題請正法梟斬市曹其餘擒獲賊黨現在嚴審究罪此  
皆自作之孽

國法森嚴不容寬貸惟是村野愚民安分守己者固多  
而好勇疾貧爲非樂禍者正復不少不知自顧首領  
因未講究律條一旦身陷大法害及鄉鄰而使老幼  
連坐重可憫也謹按

大清律內開凡謀反及大逆但共謀者不分首從皆凌遲  
處死祖父父子孫兄弟及同居之人不分共姓及伯  
叔父兄弟之子不限籍之同異年十六以上不論篤  
疾廢疾皆斬其十五以下及母女妻妾姊妹若子之

妻妾給付功臣之家爲奴財產入官知情故縱隱藏者斬又凡謀叛但共謀者不分首從皆斬妻妾子女給付功臣之家爲奴財產並入官父母祖孫兄弟不限籍之同異皆流二千里安置知情故縱隱藏者絞憲典昭然爾民皆宜家諭戶曉何苦以七尺之軀輕干三尺之法試觀近年叛逆渠魁擁兵踞險潰敗相尋何況狗鼠么麼稍萌異念立取屠滅本部院矜念愚氓惟恐不教而誅合再嚴示諄切曉飭爲此示仰督屬士民人等知悉務須凜遵

國典保守身家共樂昇平將謀反叛逆律例互相講解

俾鄉里宗族咸知利害內有不識字義者亦須傾耳默記念此叛逆不軌誅戮之外一人作孽害及全家祖孫父子兄弟夫婦皆不能保豈不可畏如地方遇有愍不畏死之徒造逆惑衆立即首報所司以免株累但不許奸徒以無影之事誣指害人敢有不遵致干嚴拏正法悔無及矣本部院特爲曉飭各保身家毋得視爲泛常不思儆惕凜之愼之特示

嚴拏積蠹飭禁株累告示

康熙十九年十一月

爲嚴拏積蠹巨懲飭禁砌款株累事照得衙蠹害人爲禍甚烈此輩舞文弄法作弊叢奸蠱媚官府魚肉小民是其長技如承管錢穀則有侵蝕加耗之蠹經承刑名則有恐嚇詐財之蠹供應軍需則有私派苛斂之蠹催收糧餉則有勒贈索費之蠹鑽竄用事則有關說過付之蠹謀差籤票則有恣肆橫行之蠹遇審事則有打詐班例之蠹遇詞訟則有包攬打合之蠹收稅管鹽則有剝擾商賈病民侵課之蠹漕運驛遞則有扣剋苦累軍民夫役之蠹甚至無中生有不

風起波磨河欄吻飛噬殷實之家提掇改移逢長本  
官之惡凡此確正互蠹上而司道下而府廳縣佐各  
衙門燕處不有浙省吏治不清閭閻困苦半由衙蠹  
爲害先經嚴檄飭拏痛加繩治乃不肖劣員平日通  
同私暱貓鼠同眠視爲心腹豈肯割愛揭報或不得  
己而充數塞責不過么麼新役李代桃僵究竟窮兇  
極惡悉皆漏網更有積猾巨奸自知不免巧借無影  
之事故爲點綴或撫他人之款假砌虛贓及至發審  
每多不實此又窩訪造訪兩浙歷來之大弊以故移  
甲就乙率皆素不謀面之人捕影捉風盡屬絕不相

于之事如近日顧朝錫一案將訓蒙之屠舍章指爲孤貧頭目炭行之吳伯泓開作典當舖家憑空插入款內不但對簿情事茫然且使匍匐公庭經年拖累諸如此類難以枚舉是蠹惡未懲反致無辜小民先受其害總由開報之本管官朦朧脫卸黑白混淆司道各官又不實心體察虛應故事執法殃民莫此爲甚除另行確訪拏究併行司道遵照外合行出示曉飭爲此示仰督屬官吏人等知悉嗣後各該管官務期嚴加鈐束不時釐剔毋得仍前容隱藉爲心腹串通過付貪黷殃民自干叅處確正積蠹卽速開列確

款確賊據實揭報聽候拏究倘仍踵錮弊徇庇大害  
縱惡養奸及捥飾微賊故捏虛款再將事外無干之  
人巧砌株連定將本管官及轉行揭報之官一體

題叅仍將窩訪造訪奸徒拏究盡法處死言出必行各  
宜凜遵毋貽伊戚

力敦風俗儉樸告示

康熙二十  
年二月

爲力敦儉樸以厚風俗事照得兩浙軍興以來低離  
滿目轉徙載道死於鋒鏑飢寒者不可勝計今幸地  
方寧謐民物安恬凡我官吏四民父老子弟正各痛  
定思痛省愆約己移風易俗之時也向聞浙俗淳厚  
勤苦儉約喪祭婚嫁稱其有無歲時伏臘飲食宴會  
各有常度至於衣飾居室均安其分未有敢於逾制  
肆侈者也若治遊陸博一切耗費之事稍一濡迹人  
輒目爲不祥長老戒其後生父兄飭其子弟以故家  
給人足民安物阜不意數十年來俗尚澆靡衣服必

極其綺麗器皿必極其精工食物必極其豐美屋宇  
必極其華飾爭相效尤無所底止梨園卜夜幾竭中  
人之家車馬遊春豈止杖頭之費狐裘貂帽下賤及  
於輿僮金縷寶釵紛靡悅其婦女甚至娼優隸卒亦  
竟無所分別矣更有兒女婚娶妻室生辰親朋應酬  
里鄰宴會不憚變產揭債剗肉醫瘡最可異者行頭  
物色傾家產以炫新奇賽會迎神逞淫巧以驚耳目  
創名禮拜則旗幟轟天演席花園則笙歌匝地而其  
破家蕩產之尤者無如賭博馬弔構營串棍設局置  
囹圄產家貲立化烏有本部院亦既申嚴告誡近來

此風更盛殊切痛心惟是有司爲親民之官鄉紳爲閭里之望必先敦崇儉樸而後小民有所效法况當兵革災荒之後尤宜節省物力培養元氣共樂昇平用是諄切告誡合行出示曉飭爲此示仰督屬官吏士民人等知悉嗣後一應居處服食婚喪宴會慶弔禮節各宜樽節自爲生計其餘奇技淫巧冶遊玩好不急之費槩行痛絕不惟惜福安分亦以返樸歸淳至於賭博馬弔蕩析身家尤爲首禁倘仍不知悔禍侈靡相高以致越禮逾制自干

功令定行拏究重懲以挽薄俗官員紳士更期澹泊儉約

共砥波靡諒有同心勿以本部院此言爲迂也特示

禁革漕弊十款告示

康熙二十年九月

爲禁飭漕糧積弊痛加釐剔以甦民困事照得浙西  
地方連年兵馬往來供應繁苦加以旱澇頻仍收穫  
鮮少以八十餘萬漕糧數十餘萬銀錢定限二月內  
盡數完納民間剝肉醫瘡已不堪命若再無藝誅求  
額外苛派官弁丁蠹橫行剋剝嗟此予遺何以存活  
本部院屢經禁飭不啻三令五申今徵漕伊始除經  
密訪叅拏究處併檄行司道各府遵照列款嚴飭通  
行外爲此示仰督屬官吏軍民人等知悉嗣後漕糧  
徵收兌運照依後開條約實力遵行如有視爲故套

陽奉陰違仍前恣肆妄行者一經訪實告發立將官弁從重

題叅棍蠹嚴拏盡法處死決不姑容致貽民害各宜凜遵毋忽特示

一糧米進倉出兌應用斛手籬脚看廩等夫修倉諸費前院以道里遠近酌量出錢或三十二文四十五文六十文不等貼給各項使用著爲成規無如法立弊生前項制錢俱被不肖官役朋比侵漁復於此外故生枝節捏名指派迫漕船到次又聽強丁悍弁橫勒私截或二百文及三四百文不等計民間完糧一石

連正裁私貼加派共費銀七八錢不等以致百姓罷市鳴冤逼迫自盡地方官如同木偶竟無區處良策殊堪痛恨今除完糧正裁并原議貼制錢聽從民便自行支給外如有不遵官收官兌額外科索分釐私貼者該縣將不法旗丁立時拏解并縱容運弁據實揭報以憑緝責叅革如監兌各官扶同容隱并道府查察不嚴一併

題叅不貸

一自道府廳縣以及佐貳等官督徵監兌各有職掌自應釐奸剔蠹以期弊絕風清乃令運丁聯幫橫行蠹

棍交相煽惑司漕各官全不悉心整飭百姓倒懸莫知顧恤總以漕糧一項向來各衙門立有陋規公行派索具文解送甚至前官已經搜盡署官復肆貪饕上下相蒙甘受線索一任刁軍惡棍百般苛詐甘心隱忍莫敢摘發敗壞法紀莫此爲甚今後司漕大小各衙門務須洗滌肺腸從新振作敢有仍以漕規科斂分送者本部院察訪得實定將受贓職名特疏叅拏重處

一糧長之名久經禁革惟貪官蠹役無糧長不能藉以營私於是改易名目稱爲區甲該年鄉總傳催當分

等項名色遞年更換究竟仍是糧里之人按役充當  
又積年光棍盤踞倉場夤充歇家更名看夫等役串  
通該縣蠹胥從預徵輕濟月糧起以及開倉收糧出  
兌開行止指派之名愈出愈奇谿壑之慾不飽不厭  
浙西士民視糧長爲畏途破產亡身人人飲泣嗣後  
爾民凡有本年應完漕糧照額依限上納領串歸農  
不必復來縣倉伺候其積年衙蠹本部院現在訪拏  
該道府廳縣務將巨惡惡蠹卽時察拏據實揭報并  
將積年倉歇盡行禁革仍將革過倉歇姓名呈報查  
核如仍畱倉歇縱蠹殃民以及暗存糧長名色作弊

逞私爲掩耳盜鈴之計許爾糧里直陳控告本部院  
立時拏究爲爾民除害毋得隱忍含容自貽伊戚

一漕糧之爲害不獨衙蠹倉歇縱橫虐民而地棍劣矜  
從中簸弄爲禍尤烈查杭嘉湖土棍劣矜所在皆有  
虎踞縣中擅作威福專揆鄉民某某股實某某愚懦  
見伊該值糧現強拉包攬於中取利卽前議定各夫  
工食制錢官蠹旣已分肥矜棍必畱坐位名爲討注  
糧船到次旗丁必先親暱其家私相打合然後赴倉  
講兌一應私貼銀錢由伊出口許聽一例派斂運丁  
仗彼巧作機關矜棍藉此暗中分潤名爲賣水次印

官明知而不敢問稍不遂慾羣起公訐互相謗訕苟見指陳地方利弊假公濟私者大約皆係此輩嗣後如有劣矜地棍人等在縣把持魚肉小民許被害之人指名呈告縣官卽時拏解以憑盡法重處

一斛面已准倉場衙門移行照依舊制祖斛自應公平斛量出入如一乃聞各縣現製斛面不用釘鉗不加炮記故將鬆板裝成得以高下其手且十斛三尖淋漓滿地小民粒粒辛苦而泥沙狼戾盡飽貪腹殊堪痛恨今歲收兌漕糧務將官斛校準縣官親用鈐記督收其淋尖踢斛并三斛一尖等弊盡行痛革敢有

官役不遵示禁欺侮鄉愚仍前婪索者許被害人等指名呈告以憑嚴拏究治

一圖差害民本部院屢經嚴行禁革無如若輩狡同兔窟官吏藉爲虎張陽奉陰違成牢不可破之局輕齎灰石行月等項每一事必有一差道府廳縣佐貳等官亦一行必專一役濫差之害弊難悉數除現在密拏外嗣後催收糧米并各項錢糧照依向例刊給簡明易知小單將每戶下原該田地若干額徵銀米若干逐一確核扣算明白每戶各給一單令彼照單依限完納其道差下府廳府廳差下州縣州縣差下鄉

都嚴行禁革如仍踵前弊混差滋擾一經訪實告發  
定將濫差虐民職名特疏糾叅并將差役盡法處治  
不恕

一今歲入夏以來雨水泛溢田禾大半浸沒自六月至  
今異常亢旱早晚二稻俱無收穫卽有稍穫些須大  
率米粒碎小不能豐實收糧官止須驗明米色乾燥  
潔淨無有糠粃麩穀卽與斛收不得借端苛勒滋擾  
如違許被害控告以憑驗明究治

一漕糧出兌軍民原不許見面向經各院條規每日額  
定米數掣籤交兌限日開行歷有成案可考近來各

屬官弁不遵成規派船配廠分圖對兌致旗軍認定  
某圖某廠爲我應兌之米藉口截銀裁減橫索私貼  
軍民交關如同鼎沸先經本部院檄飭隨據糧儲道  
議詳製備竹籤令監兌印運各官於臨兌之時當堂  
抽掣運丁領籤受兌等因批行在案嗣後印運官弁  
一體遵照製籤掣兌永不許軍民見面如仍派定圖  
都廠間配船對兌致軍丁藉端勒措擾累糧民者將  
官弁糾叅旗丁細責不饒

一領運官督丁兌運起交隨幫官催償船隻回空俱應  
潔己奉公恪盡職掌今領運官惟利是圖平時專撥

某家富厚可啖某人懦弱可欺無論軍籍民戶借金運之名施攫取之術先以報名誘嚇私行賣放少不遂意卽通申都司糧道不察來歷混行僉拏若無奈承認則又多發難端如措索見面花紅匿賣底船字號等項種種苛索不可枚舉窮丁受累家破人亡如杭州右衛千總蕭發逼死運丁喬慎可金華所千總謝天濤將民戶余士蛟混扯軍籍挾仇妄報已經審擬發落此皆明驗也至於現在運丁每年定有陋規先勒具送領狀隨於現發錢糧扣除及督船到次縱容軍丁恣肆打詐插身分潤恬不爲恥隨幫官皆係

無籍棍徒夤緣冒充批委到手一班狐假虎威科派  
滋擾以致軍丁弁髦法紀臨兌成羣夥詐開行任意  
逗遛糧船愈致稽遲小民益深苦累漕法弊壞皆由  
於此今後一應陋規挾詐等弊盡行革除如再貪黷  
乖張擇殷飛噬駕軍害民許被害人等據實呈控以  
憑嚴拏按漕法細打仍行叅革不貸

一漕截銀兩原係給軍之項祇因軍需孔亟酌裁充餉  
餘仍給發軍丁近有借充餉之名銀色勒令足紋傾  
鎔成錠方准收受每兩勒加火耗一二錢不等解費  
四五分不等嗟此窮民何堪剝削今年收截止須驗

明紋色卽零星小塊亦准收納其火耗解費添兌等項盡行禁革至於運丁以船爲業經洪歷險惟籍截銀支應毋聞給發截頭攪和色銀短少等頭放散負重修船行月折銀盡借使費名色看幫次之強弱定扣頭之多寡甚至四折五折六折不等運丁愈窮鄉民愈苦皆由不肖官扣剋之故嗣後給發各項錢糧該管官務須當堂親行驗給不許絲毫扣除如仍踵銅弊不加痛改本部院查訪得實叅拏究處悔之晚矣

一受兌開行向來定有嚴限凡幫船到次卽時開倉立

督上船今監兌各官袖手旁觀衙臺杙棍交相鼓煽名雖調停實營私窟致運丁稽延觀望漕運一日不開必有一日加增遂致軍民交訐成何法紀今漕船到省勒令卽日興工修船一完卽令赴次交兌不必候齊成羣生事如漕船到縣該糧儲道酌定交兌日期檄知印運官弁遵照如某衛所某幫某丁船於某日到次該縣卽日通報然後將某日兌給某丁船米數三口一報以憑本部院查考如有逾限不報開行卽以違禁索詐聽候拏究挽遲爲速庶於漕務有裨

嚴禁奸民通海告示

康熙二十年九月

爲嚴禁奸民透越接濟以遵

功令以安海疆事照今沿海一帶賊艘飄忽靡常每圖乘間登犯焚擄劫掠擾害生靈現經整頓舟師刻期勦蕩惟是此等游魂寄命窮洋必藉米糧貨物苟延旦夕若無接濟何能存活本部院節次申嚴力行保甲共相稽防協力守禦以期疆圉鞏固民生安業今台寧各汛日報賊踪游移內洋屢次登犯揆厥所由蓋以時當秋盡禾稼登場希冀乘機搶奪以爲糧食除經嚴檄沿海各將領轉飭備禦加謹巡防外恐有不

法奸民交通透越干禁妄爲利寇資盜俱不可定合  
行通飭嚴禁爲此示仰官吏兵民人等知悉務各凜  
遵法紀毋得妄行透越米糧紬布及一切貨物不得  
違禁下海交通接濟其地方保甲自爲稽查守口官  
兵嚴行巡緝毋得知情容隱通同故縱敢有愍不畏  
死之徒甘蹈重法定行嚴拏照例治罪決不輕貸凜  
之慎之

申飭合屬文武告示

康熙二十一年七月

爲曉飭合屬盡除夙弊砥礪官方凜遵

功令事照得浙省自值軍興本部院暫旅三衢專意辦賊兵馬絡繹機務旁午雖民生之休戚吏治之臧否戎政之勤惰俗習之奸良未嘗不時厯於懷第以遠距上游鞭長莫及地方文武不肖官弁恣肆敗檢貪黷乖張信靈行奸徇情鬻獄嚴刑酷拷私派橫徵干犯法紀之事無所不爲甚而秦盜誣良縱兵行劫巡防惟工騷擾守禦奔致疎虞占冒虛廩濤張掩飾則又所在皆是馴致地棍勾旗指逃串詐營兵放債准利

賣身媮民以局賭破家惡少以游閑上盜劣矜把持  
武斷豪右怙惡無良風俗澆漓人心敗壞總由司土  
各官不能視躬表率以至於斯也嗟嗟吾民游經盜  
賊兵燹供億糧芻兩賜疾病之餘迄有今日三空四  
盡室無蓋藏糶穀賣絲僅存皮骨此正加意休養冀  
培元氣之時豈容不肖官弁縱容兵蠹旗廝惡棍荼  
毒吾民本部院每念及此不禁痛心疾首又念人雖  
至愚誰不顧惜功名自愛身命今奉

旨班師重覩昇平此正諸務維新之時故不靳告誡叮嚀  
改過遷善盡除夙弊毋干大法其真正貪官衙蠹勢

惡土豪悍兵地棍除一面確訪分別叅拏從重究處  
實力舉行外合再曉飭爲此示仰督屬文武官員兵  
民人等知悉自今以後務各凜遵法紀克勤職業砥  
礪官方敢有不肖文武劣員貪酷敗檢叢弊殃民巨  
蠹窮兇過賊仇法強兵悍卒生事滋擾光棍營梟借  
端挾詐豪右劣衿把持怙惡或告發有據或訪聞得  
實一面拏究特疏

題叅從重懲處決不姑貸慎之慎之

嚴禁賭博告示

康熙二十一年七月

爲緝拏賭博奸徒以靖盜源以安地方事照得呼朋聚賭多係游手無藉之徒輸極無聊則亡命犯法之事無不可爲故語云賭近於盜況今世風日變呼盧不已轉爲鬪葉馬弔之風浸淫遠近忘餐廢寢晝夜不絕於是奸棍乘機串同旗營豪惡開場放賭揆聽良家子弟殷懦愚民引誘入局拈頭設阱潛藏高樓密室深巷幽居婦女司門蹤跡詭祕羸則流連忘返輸亦無計脫身遂使勒票滾利傾蕩家財窘辱兇威準折妻女更有一種惡棍糾合旗丁身藏賭具匿於

冷街僻巷廟宇神祠喝采擲骰巧誘無知執籌行詐  
又或羣聚通衢藉名擲色遇有擔負行人蜂攢搶奪  
種種無良不可枚舉地方印捕等官漫無巡察總甲  
捕役縱庇扶同馴致奸徒肆無忌憚強劫公行率由  
於此本部院屢申告誡全無改悔總以軍前遙遠未  
經懲創賭風日熾盜患難除今當旋省加意剔釐一  
面密飭該管官緝拏嚴究外合再禁諭爲此示仰官  
役兵民里甲人等知悉嗣後凡有窩藏賭博聚衆呼  
盧以及鬪混江打馬弔者許該坊里保總甲鄰佑執  
獲壽具報明該縣嚴拏如係民人卽照例擬罪具詳

如係綠旗營兵解赴本部院軍前盡法懲處如係滿營旗廝卽行申解以憑帶赴公衙門會同

將軍照例重治有經旁人首告審實必將該地方里甲人等連坐究擬或係本部院訪確差拏定將印捕各官照失察例叅處言出必行斷不寬假衙役里甲人等亦不許借端騷擾及刁惡地棍捏情誣首加等治罪愼之毋忽

嚴禁營債告示

康熙二十一年七月

爲嚴禁營債剝民察拏奸惡緣棍以遵

功令以甦民困事案准

兵部咨開僉都御史張疏稱營官壓勒地方官員  
攬事說情官兵占行賈易恣行放債將民間之妻子  
忍拆嚴行禁止等語應將此處行文督撫等通行滿  
漢營官兵丁若有擾害地方情弊者該督撫等卽指  
名題叅若督撫等徇情不行題叅或被科道題叅該  
督撫等一併嚴加議處等因奉有

俞旨欽遵通行禁飭又查現行則例內開旗下人既不准

出境外放債與境外州縣民控告者槩不准行其境內之人欠債能還而刁蹬年久不還者准行審理若借債之後身死而家業實無可還之物者債主雖告亦不准行等因頒行在案是營債剝民久有

禁令其如浙省無藉惡棍每多駕營滾利違

旨殃民本部院屢經禁飭悍兵惡棍全不悔禍自悛流毒閭閻日甚一日凡遇民人借債止有七折八折票約則勒寫足數又加每月每兩行利三分此外又科索東道錢保人錢種種名色窮民借銀到手十不及半迨至取償不容少寬時日或利息過月不還又勒展

票利上加利不數月間貲產吸盡禍及妻孥始慮民人不卽依從先肆兇威登門毒毆弔管拷打百般狼藉命若懸絲勢不得不鬻妻賣子甚至毆打傷重慘致殞身又或窘迫無聊因而自盡而狼丁惡棍方且張牙磨吻擇人飛食里鄰親族咸遭波累本利疊算孰敢逋欠分毫管債之害一至於此惟是推原禍始旗營與民人原不相識乃有一種絳棍勾通引誘輒墮牢籠今欲除違

旨剝民之大害必先除釀禍設罔之根源除暴安良惟此爲亟除咨會

鎮浙將軍外合再嚴示禁飭爲此示仰官吏旗民里甲人等知悉嗣後旗營兵廝務須恪遵

功令不許重利盤剝及違例出境放債凡從前未清債負止許照依本利清還如果有刁蹬不還止許照例呈告審理如敢仍前怙惡肆行弔打逼勒妻孥飛害親朋鄰里者被害之人據實呈告以憑會審治罪至奸惡絳棍亟宜痛改前非毋許交結旗營影射詐害如再容畱旗廝交結往來公然放債及巧立即于錢百日錢等項名色代爲中保圖利者兩鄰總甲報鳴該地方官拏解本部院軍前審實立斃杖下如兩鄰總

甲通同容隱告發訪聞定行一併嚴究懲處爾等百  
姓亦須仰體軫恤毋得甘墮術中自貽噬臍有負本  
部院恤民至意

禁革巧取火耗告示

康熙二十一年七月

爲禁革巧取火耗以蘇民困事照得本部院視師九載雖軍旅倥偬凡於民生疾苦時刻厪念所有興利除害之事申嚴告誡不啻再三無奈銅弊叢奸牢不可破如各屬火耗一項有名爲自封投櫃及至拆封或稱銀色青潤或稱等頭短少旣已按數追補仍復加倍科罰以爲榜樣而差役需索往來使費又且倍蓰鄉民視爲畏途何敢不加一加二投封於櫃以蹈不測之禍又巧立官匠名色一應錢糧俱令赴彼傾鎔稱足必用官匠烙記又設匠頭在櫃估驗復令印

鈐封上方准投收若無舖匠記號櫃吏決不給發收  
串蓋假手於匠役稍不遂意惟銀匠是問在匠役既  
飽現在之谿壑復畏將來之株累自不得不爲官蠹  
預畱地步勒令加一加二此外經收櫃胥每給一串  
亦必勒錢一二十文且聞完納房號不計完銀串票  
竟算房屋間數且於間數之外浮加混報指稱各衙  
門公費肆意瓜分各蠹乘機弄完房號一間勒串錢  
四五十文不等亦有縣胥不收串錢弄里竟派規例  
或八兩十二兩每年二次徵收及至傾銷發解又按  
圖加派名爲解費公然籤票追徵上下相蒙恬不爲

怪本部院雖遠駐上游民間利弊洞如觀火卽欲槩  
繩以法誅之不勝其誅今當班師耳目日近各宜洗  
滌肺腸痛加俊改決不肯少事姑息重困吾民除一  
面現在察拏叅處併檄行布政司及各府遵照通行  
外合行嚴示禁革爲此示仰官吏士民人等知悉嗣  
後徵收錢糧遵照

部頒法馬聽民自封投櫃如有零星小塊止期足色  
紋銀而止不得勒令傾鎔成錠若果有青潤短少止  
許將戶名欠數開明示知該里聽其下次完補不得  
擅差胥役下鄉滋擾其一切加耗并設立銀匠傾估

鈐記科派解費及櫃吏措勒串錢等弊盡行痛革如  
有陽奉陰違官蠹通同斂派巧取分肥爾百姓卽據  
實指名呈告以憑嚴拏審實官卽特疏從重

題叅盡卽立時處死本部院言出必行斷不寬恕各宜  
猛省保全身命毋貽後悔

嚴禁關稅橫徵告示

康熙二十一年七月

爲再申嚴禁額外橫徵之弊以遵

功令以肅關政事照得商賈買賣貨經營設關抽稅奉有部頒則例分別條款照項徵輸然必俟商賈抵關按貨抽納從來有就地交易部則不載及貨不由關并己經過關上納稅銀之後積蠹奸書叢弊軌法縱差巡攔擅遣家人內丁分踞要津借端搜奪任意苛求節節搜查常稅之外復多私稅層層疊罰倍稅之銀幾俾貨本卽如省城水陸各門一班蠹棍輒借查稅名色不論畸零包裹半肩行李無不喝令開看倒篋翻

囊行同禦貨乘機攫奪無所不爲以致商旅視爲畏途怨聲載道前奉欽頒

恩詔內開各處關差有將不應納稅之物額外橫徵差役四出分踞津隘擾害商民者該督撫題叅若不行題叅事情發覺一併從重治罪等因欽此是責成督撫稽察關政橫徵之弊旣嚴且切向因遠在軍中已經出示禁飭今本部院班師旋省商民困苦亟應駐息斷不容仍循前弊除一面密訪查拏外合再申嚴示禁爲此示仰官吏商民人等知悉嗣後貨物應行納稅者俱照定例遵行不得隱漏取咎如有仍前將不

應納稅之物蠹書作弊額外橫徵巡攔差役分頭四  
出盤踞津隘及各城門恣肆擾害借名搜求者或經  
訪問或被告發查審得實定卽特疏

題叅蠹書攔役一併嚴拏盡法究處斷不姑恕凜之慎  
之

嚴禁捕役誣良告示

康熙二十一年七月

爲嚴禁惡捕緇盜扳窩誣良私拷以肅法紀以安民生事照得捕役誣陷私刑立法甚嚴現行則例內開凡番役人等捉獲強盜先送官審不許私刑取供違者於本衙門枷號一箇月責四十板革役如得財及誣陷無辜者從重科罪至於妄用腦箍毛竹連根大板及竹簽烙鐵等刑致斃人命者以故殺論不准援赦其初招既定不許續扳又拏強盜於未審之時承問官卽驗其有無傷痕如有傷者卽將捕役詳審照例懲治等因遵行在案

國法昭然孰敢違悖詎意奸惡捕役愍不畏死凡遇強竊事案不將正犯上緊緝獲先矚殷懦鄉愚指窩指盜任意私拏多在溪林僻地古廟菴觀空房冷屋之內非刑弔拷五毒備至名爲做索言之慘不忍聞當此生死呼吸之際何求不得隨所意授矢口招承清白無辜之人頃刻卽成正盜於是恣其勒詐傾家蕩產賣子鬻妻無不飽其虎吻乃復公然私放又慮事後告發故當弔拷之時埋勒親供畱爲左券使被害者備受慘苦緘口難言若或詐索不遂卽以拷勒口供爲憑離點私臧嚇令到官照供直認少有更改倍

加嚴刑嗟此蚩蚩之民心膽墮地只顧目前暫緩痛楚含糊供認地方官方以獲盜爲倖以奸捕之刑拷勒供奉爲金科玉律冀圖結案誰肯細心推勘卽司府各官拘泥初招亦不暇更端平反孰知差之毫釐失之千里無辜之民憑空枉陷有案未結而拖累瘐死卽間有一二昭雪而身家早已破碎及至正盜就獲則又勒囑扳窩株連妄指統兇肆捉勢若抄家劫掠姦淫無所不至橫行蔑法言念及此奸捕罪不勝誅而杭嘉湖寧紹爲尤甚除一面密訪嚴拏從重究處外合行出示嚴禁爲此示仰官役軍民人等知悉

嗣後敢有前項惡捕誣良詐害妄用私刑買盜板窩株連波累如前所指諸弊許被害人等據實指名呈告以憑嚴拏審有實據盡法處死若在漢林僻地空房古廟菴觀寺院私刑弔拷許地方鄰佑僧道密報就近有司添差協拏將惡捕嚴禁通詳從重究擬如有扶同容隱事發一體治罪該管各官嚴加申飭據實揭報敢再徇縱殃民定卽一併

題叅本部院法在必行斷不姑貸

嚴禁杙棍條陳告示

康熙二十一年七月

爲嚴禁杙棍巧借條陳公行挾詐剔積害以彰法紀  
事照得地方大利大害公是公非自必博採輿論原  
不禁絕人言壅蔽耳目孰意人心狡詐習俗澆漓輒  
有一種無恥劣杙串通訟棍慣舞刀筆出入衙門初  
則獻媚乞憐繼則求情關說橫行鄉曲飛食善良庸  
闇有司任其簸弄起滅詞訟包攬公事無所不爲遂  
其所欲結聯同類長篇疊牘稱頌德政稍或拂意號  
召死黨搖唇鼓吻投遞條陳閱其詞若似乎義憤填  
胸究其實則盡皆譁張滿紙又復暗砌款蹟羅織多

入風怨微嫌讐言塵案無不闌入偶或聳准志得氣揚地棍從而和之凡詞內有名之人盡可供其刀俎百般嚇詐展轉誅求既饜其慾不難調停收局匿影潛形或詭覆匿名或巧行檢舉愚民畏其拖害事外懼其干連卽被指摘之官方欲匿瑕掩過曲意相徇從此把持之勢愈堅圖詐之心愈辣是此輩雌黃短長竟可操汝南月旦之評矣本部院飭吏甚嚴嫉惡尤甚如果有貪官蠹役身被婪詐慘痛剝膚何難指名呈告安用借稱利弊假公濟私况因條陳受財詐害者不一而足早已灼見肺肝地方所有大利大害

自必廣諮博訪加意興除刀筆快意顛倒是非妨政  
厲民首宜痛革合行飭禁爲此示仰官吏士民人等  
知悉嗣後劣矜積棍亟宜痛改各守本分肄業保身  
如或故智不悛假捏條陳希圖挾詐仍前聳誑一經  
察出文武劣矜卽行梏革從重究擬地方積棍立斃  
杖下爾等百姓倘有受害據害控告以憑嚴拏懲創  
決不輕貸

嚴禁兵捕假緝私鹽告示

康熙二十一年七月

爲嚴禁兵捕假緝私鹽搶劫肅法靖盜以恤商民事  
照得杭嘉湖紹一帶舟楫往來旣苦於盜賊生發復  
苦於巡鹽兵捕其兇惡更浮於盜有不勝其害者夫  
鹽捕之設止司巡緝私販乃因不逞巨梟聚夥拒捕  
而鹽捕得以揚舲列械使得禦敵防身遂致流毒無  
底凡無良鴆法之徒羶心艷目營謀充捕腰牌入手  
符可護身輒駕三櫓快船明列鎗銃器械或盤踞要  
津或分截港汊凡遇商民往來船隻無論有無私鹽  
邀截盤查巧立酒錢及燒紙名色船內本無顆粒鹽

斤亦必勒收常例若遇孤客行舟隻身鄉懦卽將資囊什物肆搶一空飛棹遠颺莫可蹤跡甚至黃昏暮夜公然行劫嗟彼商民飲泣吞聲無門控訴尤可恨者間有殷實鄉愚或遇重載貨物或撒鹽倉內或暗擲鹽包名爲生蛋飽其獵詐卽化有事爲無少與爭衡便可認真駕害誣稱搜獲誑首有司不肖官吏方且欣然藉以居奇動指私鹽二字隨意鍛煉傾家蕩產天日俱昏夫盜賊行劫尚慮鳴官曬緝此輩爲盜反可進退自如何問則有巡鹽之名追尋又無行劫之迹竟可公行於光天化日之下矣卽有一二受害

告發其如該管之官平日既受其牢籠事發又慮爲失察以致大法難申民害日甚至若兵丁巡鹽尤當恪遵軍紀乃敢扞法行奸稔惡與鹽捕相等如杭協千總崔士泰縱兵朱一進等借巡鹽名色行劫監生沈廷徵等財物此卽近日明驗除按軍法細打斥逐并兵丁現在嚴審究擬今本部院班師凡此藐法害民之事亟當首除一面密訪嚴拏外合行嚴飭爲此示仰官吏兵民商賈人等知悉嗣後凡有巡鹽文武衙門務須嚴飭兵捕痛改前非如果有巨梟積販人鹽確據者仍行拏究外其商民往來船隻一概不許

借名盤查希圖索詐倘怙惡不悛仍行駕船列械搶奪商民船隻及生蛋紮詐者告發訪聞立將該管官飛疏

題叅奸惡兵捕嚴拏處死決不寬貸